

## أحكام زكاة الفطر

الحمد لله وأشهد أن لا إله إلا الله وحده لا شريك له وأشهد أن محمدًا عبده  
ورسوله صلى الله عليه وسلم أما بعد...

ما زلنا نتناول كتاب الزكاة من كتاب الفقه الميسر.

المرّة الماضية اتكلمنا عن زكاة بهيمة الأنعام زكاة الإبل والجاموس والبقر والضأن  
والماعز

وبين أيدينا اليوم، هنتكلم عن زكاة الفطر.

وبإذن الله سنتكلم عن مَنْ يستحق الزكاة؟ من تُصرف إليهم الزكاة؟ أو تُسمى مصارف  
الزكاة.

### الباب الخامس في زكاة الفطر

#### ويقال لها صدقة الفطر

يعني الزكاة بتسمى صدقة إن بعض الناس اتلغبط في الحتة دي الزكاة تسمى صدقة  
عادي لأن هي صدقة، هي نوع من الصدقات. فلما ربنا يقول **"إِنَّمَا الصَّدَقَاتُ لِلْفُقَرَاءِ**

**وَالْمَسَاكِينِ"** (التوبة: ٦٠)

هي الآية دي يستدلوا بها على أن دول اللي بتُصرف إليهم الزكاة.

ربنا يسمي الزكاة إيه؟ الزكاة صدقة فمفيش مشكلة في النقطة دي.

فعشان محدش يتلغبط في النصوص الشرعية، تجد أن الزكاة تسمى إيه؟ تسمى صدقة.

فتسمى زكاة الفطر صدقة الفطر. وسميت بذلك لأنها تجب بالفطر من رمضان ولا تعلق

لها بالمال إنما هي متعلقة بالذمة - يعني بالشخص نفسه - فهي زكاة عن النفس والبدن.

لو احنا عندنا في زكاة مال وزكاة فطر:

- زكاة المال يدخل تحت كلمة مال دي كل بقى إيه الذهب والفضة والعملات والأنعام والزروع والكلام ده كله والركاز والحاجات اللي قلناها ده اسمه مال كله.

خلافًا للكلمة الاصطلاحية اللي احنا بنسمي مال اللي هو الفلوس يعني، كلمة مال في الشرع تشمل إيه؟ كل ما يُتمول.

فكل ما يُتمول ده قد يكون بهائم قد يكون زرع قد يكون أي شيء من الأصناف اللي ذكرناها.

فعندنا زكاة المال تشمل كل اللي قلناه ثم زكاة الفطر فزكاة المال متعلقة بالمال.

لذلك لما اتكلمنا في المسألة الخلافية اللي هي هل يجب الزكاة على الصبي والمجنون إذا كانوا أغنياء كانوا أغنياء أزاى؟ كانوا أغنياء بالإرث مثلاً.

فورث المجنون أو ورث الصبي الصغير مال، وفي ولي على المال ده، لكن المال مال الصبي هو مجرد الولي يتولى المال لغاية ما يكون رشيد الولد ده وخلص.

فهل يجب فيها الزكاة؟ قلنا فيها خلاف لكن الراجح أنه يجب فيها الزكاة لأن الزكاة غير متعلقة بالشخص.

إنما هي حق في المال. "وَالَّذِينَ فِي أَمْوَالِهِمْ حَقٌّ مَعْلُومٌ \* لِلسَّائِلِ وَالْمَحْرُومِ" (المعارج: ٢٤)

فهو حق مالي مرتبط بالمال مش مرتبط بالشخص اللي بيخرج الزكاة. فأينما وجد المال وجدت فيه الزكاة.

حتى لو كان صاحب المال غير مكلف كالصبي والمجنون وإنما هنا الخطاب سيتوجه إلي وليه اللي هيطلع الزكاة ديت.

- لكن زكاة الفطر موضوع تاني خالص:

ملهاش أي علاقة بالمال، إنما هي مرتبطة بالشخص نفسه أو بالبنّي آدم نفسه؛ إن احنا هنشوف إيه كميتها هتبقى متعلقة بعدد الأشخاص ملهاش علاقة بكمية المال اللي عندك.

- يعني لو انت غني جدا وبتعول نفسك بس هطلع زكاة فطر عن كام؟ عن واحد.
- لو أنت متوسط الحال وعندك عشرة عيال بس مكفيهم وزيادة هتطلع زكاة عن ايه؟ عن نفسك، وعن زوجتك، وعن العشرة عيال والكلام دوت

فزكاة الفطر ليس لها علاقة بالمستوى المادي المهم أن الشخص ليلة العيد معه ما يكفيهِ وزيادة، يعني الناس الي معاك قد ايه؟

❖ فهي ممكن يكون الغني يطلع فيها أقل من المتوسط مش هنقول الفقير أقل من الشخص المتوسط!؛ لأن العدد اللي عند الشخص المتوسط أكبر من العدد اللي عند الشخص الغني.

❖ لذلك معني انها ترتبط بالبدن ولا ترتبط بالمال أنها لا تزيد بزيادة المال ولا تنقص بنقصان المال؛ إنما تزيد بزيادة الأفراد وتنقص بنقصان الأفراد.

فده معنى أن زكاة الفطر مرتبطة بالذمة أو مرتبطة بالبدن والنفس وغير مرتبطة بالمال. خلاف زكاة المال تزيد بزيادة المال طبعاً؛ لأنها نسبة من المال وأما زكاة الفطر فليست نسبة من المال إنما هي رقم ثابت سيعضرب في أعداد معينة؛ سواء أعداد الزوجة، والأولاد وهكذا زي ما هنبين.

- ده معنى أنها زكاة مرتبطة بالأبدان.

▪ ما حكمها؟

طبعاً زكاة الفطر واجبة على كل مسلم، لما رواه بن عمر رضي الله عنهما قال: فرض؛ كلمة فرض هي من أقوي الصيغ التي يستدل بها على الوجوب.

عَنْ ابْنِ عُمَرَ رضي الله عنهما قَالَ: "فَرَضَ رَسُولُ اللَّهِ ﷺ زَكَاةَ الْفِطْرِ مِنْ رَمَضَانَ صَاعًا مِنْ تَمْرٍ، أَوْ صَاعًا مِنْ شَعِيرٍ عَلَى الْعَبْدِ وَالْحُرِّ، وَالذَّكَرِ وَالْأُنْثَى، وَالصَّغِيرِ وَالْكَبِيرِ مِنَ الْمُسْلِمِينَ".

فبيقول هنا الحديث بين أنها تجب على العبد والحر؛ ليس المقصود على العبد والحر أنها تجب على العبد إنما هي تجب على سيد العبد.

-لأن زكاة المال تجب على مَنْ يعول نفسه، وتجب عنه، وعن مَنْ يعولهم.

فإن الزوجة لا تعول نفسها في الأصل، والأبناء الصغار لا يعولون أنفسهم؛ فهي تجب على مَنْ يعول نفسه، وتجب عليه، وعلى مَنْ ينفق عليه.

فالعبد لا يعول نفسه إنما نفقته على سيده كذلك المرأة، والصغير لا يعول نفسه؛ وإنما تهتج على الزوج أو على الوالد.

بيقول تجب زكاة الفطر على كل مسلم كبير وصغير وذكر وأنثى وحر وعبد، ويستحب إخراجها عن الجنين إذا نفخت فيه الروح فهو ما صار له أربعة أشهر فقد كان السلف يخرجونها عنه، كما ثبت عن عثمان وغيره

ده مسألة مستقلة، هنعرف أن زكاة الفطر تجب على الشخص الذي يعول نفسه عنه وعن من ينفق عليه وجوباً كالزوجة والأولاد..

### طيب إذا كان أحد أولاده مازال جنينا في بطن الأم؟؟

هنقول الجنين دوت ساعة زكاة الفطر في آخر يوم في رمضان كان الجنين ده عنده قد إيه؟

عنده أقل من أربعة أشهر لا تخرج عنه لا استحباباً ولا وجوباً.. لأنه ليس فيه روح إلي الآن هو الآن قطعة لحم ليس بإنسان، مفيهوش روح عامل زي قطعة اللحم فليس مخاطب بشيء لا يعتبر كيان، ولا يعتبر فرد هنطلع عنه.

### طيب إذا نفخت فيه الروح؟

نفخ الروح ببيكون بعد أربعة أشهر من وجود الجنين في بطن أمه. لحديث ابن مسعود قال " **إِنَّ أَحَدَكُمْ يُجْمَعُ خَلْقُهُ فِي بطنِ أُمِّهِ أَرْبَعِينَ يَوْمًا نَظْفَةً، ثُمَّ يَكُونُ عِلْقَةً مِثْلَ ذَلِكَ، ثُمَّ يَكُونُ مُضْغَةً مِثْلَ ذَلِكَ، ثُمَّ يبعثُ اللهُ إِلَيْهِ مَلَكًا، وَيُؤَمِّرُ بِأَرْبَعِ كَلِمَاتٍ، وَيُقَالُ لَهُ: أَكْتُبْ عَمَلَهُ، وَرِزْقَهُ، وَأَجَلَهُ، وَشَقِيٌّ أَوْ سَعِيدٌ؛ ثُمَّ يُنْفَخُ فِيهِ الرُّوحُ**"

فهذه ثلاث أربعينات تساوي مائة وعشرون يوم...

بعد مائة وعشرون يوم يُنفخ فيه الروح فإذا مر على الجنين في بطن أمه أكثر من أربعة أشهر صار الآن حيًّا خلاص صار إنسان وله حياة هو مجرد بيكتمل نموه فقط لكن صار إنسان وله حياة زي حياتك كده بالظبط..

فهنا هل يجب بقي إخراجها ولا مايجبش؟؟

برضه لا يجب إنما يستحب فقط لا يجب لأنه لسه طالما ماخرجش من بطن الأم مش هنقول تجب زكاة الفطر على والده وإنما هنقول يستحب، طلع عنه خير وبركة مطلعش لا حرج ولا إثم عليه..

طيب يبقي يجب يخرجها عن إيه عن نفسه وعن من تلزمه نفقته، أنا الوقتي متزوج وعندى أولاد فيبقي أنا لازم أطلع عن زوجتي وأولادي، أنا متزوج وعندى أولاد ووالدي رجل فقير ومبيشتغلش ورجل كبير وأنا اللي بصرف عليه يبقي يجب أن أنا أطلع عن والدي تمام كذلك والدتي. فكل شخص يلزمني أن أنا أنفق عليه زي العبد وزى الزوجة والأولاد والأب والأم إذا كانا فقيرين لا ينفقان علي أنفسيهما يبقي أنا يلزمني كل الأفراد دول تمام!

بيقول من زوجة أو قريب وكذا العبد فإن صدقة الفطر تجب على سيده لقوله صلي الله عليه وسلم « ليس على المسلم في فرسه وعبدِه صدقةٌ ، إلا صدقةُ الفطرِ في الرقيقِ » ولا تجب إلا عني.

يبقي تجب عن مين يبقي تجب عني وعن من أعوله أنا أطلع

طيب امتي تجب عليا؟ هو إحنا هنديها لمين بقي ماهو في واحد تجب عليه وواحد هتجب ليه مين اللي هتجب عليه إيه الشرط؟

هو إيه الغني اللي في زكاة الفطر؟

غني زكاة الفطر هو أن يكون عندك يوم العيد وليلة العيد ما يزيد عن حاجتك بس، لا يلزم يكون الغني اللي هو بتاع زكاة المال اللي هو معايا فلوس معايا ٨٥ جرام ذهب ولا ٢٠٠ جرام فضة والكلام اللي قولناه ده

لكن يجب أنت فقط ليلة العيد أو يوم العيد عندك أكلك وشربك وحاجتك وغذاءك وملبسك والدنيا تمام وفي زيادة طالما في زيادة يبقي يجب عليك إيه؟ زكاة الفطر.

طالما زادت الفلوس اللي عندك أو الأموال اللي عندك أو أو عن حاجتك وحاجة من تعولهم في ذلك اليوم فقط فقط إذا يلزمك

**إذاً هي هتروح لمين بقي؟** هتروح للعكس الذي ليس عنده ما يكفيه في يوم العيد وليلة العيد تمام!

فببِقول لا تجب إلا عن من فضل عن قوته وقوت مَنْ تلزمه نفقته وحوائجه الضرورية  
عمومًا -دواء معاه زيادة كان هيجيب دوا مثلاً خلص الفلوس كلها محتاج ملبس  
الحاجات الضرورية كلها يغطيها الأول بعد كده يشوف معايا زيادة أطلع إيه؟ أطلع زكاة  
فطر- في يوم العيد وليلة العيد ما يؤدي به فطره..

### فزكاة الفطر لا تجب إلا بشرطين:

- ١- الشرط الأول: الإسلام فلا تجب على الكافر
- ٢- وجود ما يفضل عن قوته وقوت عياله وحوائجه الأصلية في يوم العيد وليلة العيد

يعني مثلاً شخص في يوم العيد عنده أكل يكفيه هو وأسرته مثلاً خلاص وكل حاجة  
خلاص تمام! هو مثلاً هو وأسرته خمس أفراد نتصور مثلاً مثلاً إنه هو كان عنده  
زيادة عن كل ده صاع واحد بس، يبقي يجب عليه يطلع زكاة فرد واحد، رغم إنه  
مفترض إنهم إيه؟ خمس أفراد بس هو الزيادة كلها اللي عنده إيه صاع من تمر مثلاً  
ده اللي كان زيادة عنده فيبقي هو يطلع عن فرد واحد لأنه أول ما خلاص الصاع ده  
بقي مش من إيه مش من أهل زكاة الفطر خلاص فاهم الفكرة.

طبعاً دي مسألة نادرة يعني لكن فالعادة عنده زيادة خلاص هيطلع عن أفراد إيه أفراد  
الأسرة كلهم!

### المسألة الثالثة: في حكمة وجوب زكاة الفطر:

من الحكم في وجوب زكاة الفطر مايلي:

- (١) تطهير الصائم مما عسى أن يكون قد وقع في الصيام من اللغو والرفث لأن النبي  
عليه الصلاة والسلام ذكر قال " زكاة الفطر طهرة للصائم من اللغو والرفث وطعمة للمساكين"  
- طهرة للصائم يعني تطهر الصائم من اللي حصل في رمضان وبتاع في دي  
مهمة جداً

علشان الإنسان يستحضر هذا المعني عندما يخرج زكاة الفطر لأننا فقط نتصور  
زكاة الفطر هي طعمة للمساكين وإنما أول من ينتفع بها هو المعطي نفسه لأنها  
بمثابة الكفارة التي تكفر سيئات رمضان

شوف بقي كام مرة كذبت في رمضان؟ كام مرة بصيت على بنات؟ و كام مرة يعني شفت إعلان وشفت مسلسل؟ واتكلمت كلام ملوش لازمة وشتمت وغلطت وكذبت كثير، فتأتي زكاة الفطر تظهر للصائم ذلك.

أن الإنسان لما يستحضر ذلك يعد زكاة الفطر يكون حريص إنه يطلع بزيادة كل ما ازداد كل ما زاد الطهر.

فميجيش بقي يقول زكاة الفطر يا شيخ السنة دي كام؟ عشرة جنيه أصل بيقلوا في التليفزيون خمسة جنيه، يعني إيه الجو ده مش جو واحد عايز طهرة للصائم عايز يتعامل مع ربنا بطريقة بالظبط، يعني إيه المطلوب مني كده خلصت

طبعًا هنقول خلاص هو لو طلع المجزيء يجزئه بس **أنا بقول للي بيتصور زكاة الفطر دي إن هي إنقاذ له** رمضان ضاع، رمضان فيه مشاكل، رمضان رايح لربنا كده في عندي مشاكل فيه ودي آخر فرصة لإنقاذ رمضان

فيجد في نفسه رغبة إنه يطلع بزيادة ويكرم الفقير ويقول طب خد بزيادة كام عشرة جنيه خد مائة جنيه، في ناس كده تلاقيها بتديلك بزيادة أوي في ده تحس إنه هو فاهم يقولك خد يا عم إحنا عكينا الدنيا في رمضان ربنا يغفرلنا

فالبتالي لما تستحضر معني أنها طهرة للصائم هتلاقي نفسك يعني أن أنت عندك رغبة أنك تبالغ في إخراج زكاة الفطر لا تبخل بها أبدًا متقعدش تحسبها بالظبط بقى عشرين جنيه ولا عشرة جنيه ولا بتاع والكلام ده هنتكلم فيه موضوع القيمة تطلع في الآخر طعام

بس انا بتكلم في أنت هتبقى ساعتها هتشر برغبة في أن تعطي المزيد

أن أنت لا تفكر في الفقير بقدر ما تفكر في نفسك أنت الآن تنقذ نفسك تنقذ رمضان،

فتلاقي في نفسك رغبة في الزيادة طالما أنه في استطاعتك **"لا يُكَلِّفُ اللَّهُ نَفْسًا إِلَّا مَا**

**آتَاهَا" "لا يُكَلِّفُ اللَّهُ نَفْسًا إِلَّا وُسْعَهَا"**

فلو طلع المجزيء خلاص لكن لو هو عنده زيادة فعلاً الراجل غني وجه عند زكاة الفطر هيطلع لأ ده هيطلع كثير في ناس في زكاة الفطر بتطلع بالآلاف. هو واحد غني وعايز ينقذ رمضان ينقذ رمضان لنفسه ولأسرته ولولاده فيطلع بزيادة

هو ذكرها في أول حاجة لأن فعلا دي أهم حاجة الفقير مش هيموت من الجوع لكن أنت ممكن تهلك يوم القيامة. فإنقاذ نفسك وتطهير صيامك أولي من إطعام الفقير

لأن تطهير صيامك بيساوي الآخرة وإطعام الفقير هو مجرد دنيا ﴿وَالْآخِرَةُ خَيْرٌ

وَأَبْقَى﴾

٢- إغناء الفقراء والمساكين عن السؤال في يوم العيد وإدخال السرور عليهم ليكون العيد يوم فرح وسرور لجميع فئات المجتمع وذلك لحديث ابن عباس رضي الله عنهما قال " **فَرَضَ رَسُولُ اللَّهِ صَلَّى اللَّهُ عَلَيْهِ وَسَلَّمَ صَدَقَةَ الْفِطْرِ طَهْرَةً لِلصَّائِمِ مِنَ الْغَوْرِ وَالرَّفَثِ ،**

**طُعْمَةً لِلْمَسَاكِينِ**"

ودي مسألة مهمة إنك لو فهمت احنا قلنا العلة الأولى إيه أثرها النفسي عليك، العلة الثانية دي أثرها برضه عليك أنك تفهم حاجة معينة تفهم أن إيه هدف زكاة الفطر؟

هدف زكاة الفطر مش حل مشكلة الفقير الاجتماعية إنما زكاة الفطر هدفها إن احنا نحل مشكلة يوم واحد في السنة عنده، لذلك زكاة الفطر صغيرة جدًا، صاع من تمر.

يعني إيه؟ يعني مقدار يسير من التمر اثنين كيلو مثلاً وربع ولا حاجة أو لو التمر هيبقى قليل لكن لو هي بر أو شعير يبقى اثنين كيلو وشوية يعني **من كيلو خمسة وسبعين مثلاً قول لاتنين كيلو ونص** ده متوسط الصاع.

لكن أنا عايز أقولك ممكن واحد يقول إيه دي؟ هتعمله إيه؟ ما هو أنت مش واخد بالك من العلة هو إيه علة زكاة الفطر؟ إيه هدفها؟

هدفها هو احنا قلنا طالما أنا عندي أكل زيادة هديها للي معندوش أكل اليوم ده علشان يبقى عنده أكل اليوم ده علشان ياكل زي زي عشان نبقي كلنا اليوم ده فرحانيين.

مش هدفي إن أنا أحل مشكلته الاجتماعية هو لسه مش لاقى دواء ولسه مش لاقى إيجار ولسه مش لاقى لبس لعياله دي مش مشكلة زكاة الفطر إنما دي مشكلة زكاة المال، عشان كده الناس بتيجي في الموضوع ده يقولك - طبعا احنا هنتكلم في موضوع إخراج القيمة كمان شوية- بس يجي يقولك زكاة الفطر طب ما نديله فلوس ما الفقير محتاج فلوس؟ ما أنا عارف هو محتاج إيه محتاج فلوس طبعا ما هو ده مش لاقى ياكل اليوم ده أكيد محتاج فلوس بس مش ده هدف زكاة الفطر، هدف زكاة الفطر إن احنا نأكله اليوم ده، والله هو صعبان عليك وعاوز تديله فلوس طلعه من زكاة المال، إما تديله من الصدقة، لكن تيجي في زكاة الفطر عايز تطلعها مال.

طب ليه عايز تطلعها مال؟ يقولك ما هو يمكن يكون محتاج دواء محتاج إيجار محتاج فلوس ما انا عارف اكيد طبعاً هو محتاج كل ده بس دي بتتحل بيايه؟ بتتحل بزكاة المال مش بتتحل بزكاة الفطر.

### ففهمك لسبب زكاة الفطر بيخليك متسألش السؤال ده

الحاجة اللي بعد كده إن بردو مهما كان زكاة الفطر هتكون كام يعني؟ أنت بتطلع للفرد الواحد عشرة عشرين جنيه لو حولناها لقيمة يعني، لو أنتم يعني خمس أفراد مائة جنيه مائة جنيه هتعمل إيه لفقير مثلاً كل سنة؟ أنت بتطلع زكاة الفطر دي مرة واحدة في السنة مش هي دي اللي هتحلله مشكلته الاجتماعية، هو عايز مبلغ كبير عشان يحل مشكلة الدواء والإيجار واللبس والكلام ده

فتجد الناس عندها مشكلة غريبة يعني متعرفش ليه بيجي في كل حاجة يعكسها.. يعني يجي مثلاً في زكاة الفطر يقولك عايز أطلعها مال

يجي في زكاة المال يقولك مينفعش نطلعها عينيات؟ أعطيله أدوية؟ أجيبه هدم؟ أجيبه مش عارف إيه؟ الله!

أنت ليه دايمًا ماشي العكس؟ يعني يجي لزكاة الفطر يقولك نطلعها مال أولى يجي زكاة المال يقولك عندي شوية هدم ينفع أخدها بدل زكاة المال، ينفع أديله دواء؟ ينفع أديله مش عارف إيه؟ عندي حاجات زيادة أديله؟ ينفع دي بدل زكاة المال؟

دايمًا عايز يمشي في العكس الأصل إن احنا نمشي على الأصل،

إن زكاة المال تخرج من جنس المال اللي احنا بنطلعه زروع يبقى زروع بهائم بهائم عمالات عمالات وهكذا..

وزكاة الفطر تطلع طعام لأن هدفها زي ما قلنا مش العلاج المشكلة الضخمة للفقير، وإنما علاج مشكلته بيتحل بزكاة المال والصدقات،

وأما زكاة الفطر فلها علة محددة هي مدتها يوم واحد فقط يعني هي بتحل مشكلة الفقير ليوم واحد فقط يعني تحويلها لقيمة مادية مش هيغير من الواقع كتير، فخلينا على الأصل إن احنا نخليها طعام طبعاً نتكلم الوقتي على موضوع القيمة تمام..

٣- بيقول هو فيها إظهار شكر نعمة الله تعالى على العبد بإتمام صيام شهر رمضان وقيامه وفعل ما تيسر من أعماله الصالحة.

ففيها شكر لله تعالى أيضاً غير تكفير السيئات فيها شكر.

طب واحد يقول لي طب واحد طالع من رمضان مية مية يبقى هو بردو لازم يطلع زكاة الفطر يشكر ربنا وهو مين بيطلع من رمضان مية مية! ده لو افترضنا يعني يبقى ده يطلع ويطلع كمان يشكر ربنا إنه وفقه إن هو طلع طاهر من شهر رمضان.

### المسألة الرابعة: مقدار الواجب، ومما يخرج

الواجب في زكاة الفطر صاع من غالب قوت أهل البلد بر شعير تمر زبيب أقط رز ذرة  
أقط: لبن مجفف.

يعني إيه صاع؟ صاع هو أربع أمدد

يعني إيه مُد؟ المُد هو ملء كفي الرجل المعتدل ملء كفي رجلٍ معتدل يعني رجل إيده لا كبيرة قوي ولا صغيرة إيده متوسطة يعني يعمل كده في الحاجة يطلع مُد

ده اسمه مُد أربع مرات كده اسمه صاع فالمُد أي حاجة بقى تمر

المُد ده مش وزن المُد ده كيله كيله.

والكيله دي عبارة عن ملء الكفين عشان كده ممكن الصاع تلاقيه أوزانه بتختلف تلاقي صاع التمر غير صاع القمح غير صاع الفول غير صاع الذرة لأن هو عبارة عن كيله فالكيله ممكن وزنها ده غير ده غير ده فأننا بقى بجيب كده بملأ أيدي أدي مُد أربع مرات أدي أربع أمدد بصاع

أكيد الوزن ده هيبقى غير الوزن ده الوزن ده تمام؟ لأن الواحدة من الحبة دي وزنها غير الواحدة من الحبة دي الخلاصة يعني إن ده كيله مش وزن فالصاع ملوش وزن الصاع له مقدار حجم كده معين

هو حوالي علبة سمنة قد علبة السمنة اللي هي الكبيرة دي تقريباً بيبقى في حدود علبة السمنة.

لذلك ممكن الوزن يختلف تلاقي صاع التمر عشان حبه كبيرة وبتاع فبتلاقي وزنه خفيف شوية. صاع الذرة تلاقيه تقيل شوية يعني إيه؟ تلاقي بتختلف حسب

### طيب هو بيطلع صاع من إيه؟

هو في الحديث النبي عليه الصلاة والسلام أخبر إن هو صاع من تمر أو صاع فرضاً كما قال ابن عمر صاع من تمر أو صاع من شعير ليس ذكر النبي عليه الصلاة والسلام للتمر والشعير هو تحديد للي بيطلع من إيه لكن هو ذكر كمثال على الأقوات اللي موجودة في زمانه.

فإذا كانت الأقوات الموجودة في زماننا تختلف هنطلع من الأقوات اللي موجودة في زماننا

يعني احنا دلوقت مثلاً مش هنطلع للناس مثلاً قمح الناس هتعمل إيه بالقمح؟ معندهاش احنا، زمان كانوا بياخدوه ويطحنوا ويعملوا دقيق ويعملوا مش عارف إيه دلوقت ممكن الفقير لو ادितه قمح يقولك هعمل به إيه؟ تمام؟ فممكن بالنسبale الفول أحسن بالنسبale مثلاً الرز أحسن بكثير جداً من إنك أنت تديله شعير مثلاً أو قمح.

يقولك أعمل إيه بالشعير؟ احنا عندنا لا بنطحن ولا بنعمل ولا بنسوي احنا بناكل على الجاهز.

فيكون مثلاً في بلد معينة الأرز أفضل بعض البلاد ممكن يكون التمر أفضل بعض البلاد ممكن يكون الزبيب أفضل حسب أحوال الناس وغالب قوتهم إيه واخد بالك

فبردو المسألة ملهاش علاقة بالثمن على قد ما لها علاقة بالقيمة الغذائية للحاجة دي عند الفقير.

ممكن عنده لو قلت له زبيب ولا الرز يقولك هات رز رغم من إن الزبيب سعره أربع أضعاف الرز مثلاً بس هو مش هياكلني الزبيب بالنسبale مش هو ده أكلتي يعني.

المهم أنت بتطلع غالب قوت البلد أو الناس اللي متعودة عليه أو بتاكله أو كده. تمام؟

بتطلع عن الواحد صاع يبقى أنا لو فرد واحد مع نفسي كده أبقى بشتغل وبصرف على نفسي أطلع عن نفسي إيه؟ صاع وما ليش دعوة بحد.

- لأ ده أنا متجوز وعندي عيال أطلع عن زوجتي وعيالي
- لأ ده أنا طالب في كلية مبصرفش على نفسي مبشتغلش أبويا هيطلع عني أنا طلعت عن نفسي والله دي كتر خيرك من مصروفك مثلاً قتلته يا بابا أنا هطلع عن نفسي كتر خيرك سقطت عنه هو الزكاة

لكن الوجوب هو في حقه طالما أنت مابتصرفش على نفسك

طيب يبقى كده عرفنا المقدار إيه؟

طيب زكاة الفطر دي لما أجي أطلعها هل الصاع يطلع لفقير واحد؟ يعني كل صاع قصاده

فقير؟ ولا إيه بالضبط؟

بيقولنا لا ملهاش حسبة معينة ممكن الصاع الواحد يطلع لكذا فقير وممكن كذا صاع يطلع لفقير واحد.

ليس هناك معيار معين فانت ممكن زي ما بنعمل كده في رمضان مثلاً شنطة حاطين فيها حاجات كتير ده على ده على ده، وندي الفقير شنطة مليانة كده وخلص فصح بيحصل ده لإن أنا ما يفترضش إن أنا أدي الفقير صاع أنا بدي الفقير الكمية اللي شايفها مناسبة له، تغنيه اليوم ده، صاع صاعين ثلاثة؛ أنواعه عادي.

وممكن يكون العملية عندي قليلة قوي والفقراء كتير فأضطر أديهم أقل من الصاعات دي كلها، كيلو بس رغم إن الصاع اتنين كيلو وشوية فأعطي كل فقير كيلو بس يبقى مدتوش حتى صاع واحد، لكن هو ده اللي الكمية اللي عندي والفقراء كتير.

في مائة فقير وأنا عندي خمسين صاع فاديت كل فقير نصف صاع وخلص فده جائز وده جائز

#### ١- حسب الوفرة

#### ٢- حسب احتياج الفقير.

❖ فعلشان كده بيقول يجوز أن تعطى الجماعة زكاة فطرها لشخص واحد يبقى الشخص ده هياخد كذا صاع.

❖ وأن يعطي الواحد زكاته لجماعة ممكن يدي صاع واحد لكذا فرد.

تقولي طب افرض الفقير جاله أكل كتير قوي وصار غني بقى في اليوم ده من كتر ما جاله هيجب عليه ساعتها إيه؟

هيجب عليه ساعتها زكاة الفطر هو بعد كده يروح مطلع بقى لإن هو بقى غني.

❖ فإذا اغتنى الفقير وجد نفسه عنده أكل يكفيه هو وأسرته، وبقي في زيادة هيبتي هو يطلع زكاة فطر لأن هو بقى دلوقتي عنده ما يفيض عن حاجاته وحاجات أهل بيته في اليوم ده لو تصورنا كده يعني.

▪ بيقول ولا يجزيء إخراج قيمة الطعام لأن ذلك خلاف ما أمر به رسول الله صلى الله عليه وسلم وأنه مخالف لعمل الصحابة فقد كانوا يخرجون صاعاً من طعام ولأن زكاة الفطر عبادة مفروضة من جنس معين وهو الطعام فلا يجزئ إخراجها من غير الجنس المعين.

هنا اختار قول الجمهور وده فعلاً قول الجمهور (الجمهور: معناه أكثر العلماء وليس معناها إجماع)

\* في فرق إن أنا أقول ده قول الجمهور وإن أنا أقول إجماع إجماع: يعني اتفاق العلماء قاطبةً على القول ده (يعني مثلاً نقول الصلاة فرض هذا إجماع الحجاب فرض هذا إجماع).

فأما إن احنا نقول مثلاً إخراج زكاة الفطر طعام نقول هذا قول الجمهور وليس بإجماع.

لما أنا أقولك هذا قول الجمهور تفهم إن في خلاف لكن المخالفين أقل. إذاً القول ده اللي هو وجوب إخراج زكاة الفطر طعام مبني على أدلة.

### من الأدلة: -

١/ قول النبي عليه الصلاة والسلام "زكاة الفطر طهرة للصائم وطعمة للمسكين".

طعمة للمسكين فهو سماها إيه؟ سماها طعمة للمسكين.  
فَنَص الحديث واضح في إن هي يجب أن تخرج إيه؟ طعام.

٢/ ثم إن النبي عليه الصلاة والسلام "فَرَضَ رَسُولُ اللَّهِ صَلَّى اللَّهُ عَلَيْهِ وَسَلَّمَ زَكَاةَ الْفِطْرِ

صَاعًا مِنْ تَمْرٍ، أَوْ صَاعًا مِنْ شَعِيرٍ"

فده صريح في إن هي تكون إيه؟ طعام.

ثم إن العلة بتاعتها بتبينلك إن هي المفترض تكون كده هي علتها إطعام الفقير زينا يوم الفطر يفطر زينا ياكل زينا.

فهي علتها إن هو يطعم أصلاً زي ما قلنا مش علتها إن أنت تحل مشكلته المادية عايز تحل مشكلته المادية حلها بزكاة المال أو بالصدقة فده يدل على قوة المذهب ده.

▪ طبعاً ده مذهب الجمهور يعني مذهب مالك وأحمد والشافعي رحمه الله خلافاً لأبي حنيفة.

أبو حنيفة يرى أن زكاة الفطر ممكن تخرج بالقيمة إذا احتاج الفقير إلى ذلك.

إذا كان أنفع للفقير أن تخرج قيمة، في مذهب الأحناف أو مذهب أبي حنيفة يعني أنه يجوز ذلك إذا كان هذا أنفع للفقير فكان لا يرى أن إخراج القيمة هي عملية استثنائية في حالة إن أنت تعلم أن الفقير هذا أنفع له وده مذهب الإمام البخاري.

وهو دليلهم كله كان حديث اختلف العلماء في الصحيح اللي صححه يعني مال إلى جواز إيه؟ إخراج الزكاة قيمة واللي ضعفه هيقول مينفعش.

فهو حديث معاذ لما أرسله النبي عليه الصلاة والسلام إلى اليمن في بعض الروايات إن هو طلب منهم بدل ما يعطوله زكاة الأموال يعطوه ثياب فقال **هذا أنفع لأهل مكة** أو قال **هذا أنفع لأهل المدينة** والرواية دي فيها خلاف.

هل هو خد منهم ثياب بدل الزكاة ولا مخدش؟ الرواية دي في ناس ضعفوها وفي ناس إيه! صححوها

وبناءً على ذلك اختلفوا في موضوع إخراج القيمة في زكاة الفطر.

وطبعاً اللي قال إخراج القيمة زي ما قلنا بردو حظ شرط إن هي تكون إيه؟

**أنفع للفقير** مش مطلقة عشان كده حتى لو قلنا بالخلاف والناس مثلاً لو حد فيهم مثلاً خد بالقول ده نقوله القول ده اشترط إن أنت تكون عارف إن ده أنفع للفقير مش كده وخلص، كله يلا بينا نطلعه فلوس وخلص.

المهم إن المسألة دي تخليك مثلاً حتى على الأقل وإن كنت طبعاً احنا بنميل إلى مذهب الجمهور أن هي يجب أن تخرج طعام لكن تخليك حتى في المسألة دي لما بتثار كل عام في الجرايد وفي التليفزيون ما تتشنجش يعني.

يعني اللي بيقول إخراج القيمة ده مش ضال ولا بيخرف ولا تقعد أنت تقول إيه الكلام دوت وده ده الناس دي بيخرفوا

الكلام ده كلام أبو حنيفة كلام البخاري فينبغي إن احنا نراعي إن المسألة فيها خلاف وخلص واللي حياخد المذهب دوت هيقعد شيخ مثلاً أفتاه بذلك خلاص.

لا يعني منقدرش نقوله حاجة لكن والله أعلم الأقرب للصواب هو مذهب الجمهور وهي أنها يجب أن تخرج إيه؟ تخرج طعام وده الأحوط والأسلم للدين كده أنت محدش يقدر يقولك تلت التلاتة كام؟

لكن طلعتها قيمة تخش بقى في سين وجيم لا ينفع لا مينفعش، لا عيدها لا الكلام ده الموضوع صغير يعني مش محتاج إن احنا نقعد نفاصل فيه زكاة الفطر محدودة أصلاً فطلعها طعام وبعد كده أدي الفقير مال عليها اديله الصاع وبرأ نفسك من زكاة الفطر وبعد كده اديله عليها فلوس يبقى كده خلاص جمعت الخيرين. تمام!

## وقت الوجوب

امتي تجب امتي بالظبط؟ وقت وجوبها وإخراجها.

بيقول تجب زكاة الفطر بغروب الشمس من ليلة العيد لأنه الوقت الذي يكون به الفطر ما هي زكاة الفطر امتي بنفطر من رمضان؟ لما بتغرب شمس آخر يوم في رمضان، هو ده الوقت اللي يجب ساعتها إن أنا أخرج فيه زكاة الفطر.

**ولإخراجها وقتان:** وقت فضيلة ووقت جواز

-وقت **الفضيلة** يعني أفضل وقت تخرج فيه- بيقول **من طلوع فجر يوم العيد إلى قبيل أداء صلاة العيد.**

يعني من فجر ليلة يوم العيد لصلاة العيد لكن ده طبعاً وقت صعب، ضيق جداً بالنسبة طبعاً لظروف المدينة وكده يبقى صعب إن أنت في الوقت ده تطلع الزكاة وتوصلها للفقير.

لكن زمان كان الناس أصلاً يعني هم بيوصلوا الزكاة وعارفين الفقراء أماكنهم سهل إن أنا أصلي الفجر أروح أدي زكاتي لفقير.

لكن دلوقتي الموضوع بقى مساجد وجمعيات ومش عارف إيه مفيش حد هيبقى فاضيلك بعد صلاة الفجر ممكن تخش في كعبة إلا لو أنت عارف فقير فعلاً خلاص خلي الزكاة في الوقت ده يطلع بعد الفجر اديله اشتري أنت الطعام وجهزه، وبعد صلاة الفجر روح وصله له يبقى أنت كده خدت أحسن وقت.

ليه هو أحسن وقت؟

لأنك أنت ضمنت تماماً أنه سينتفع بهذا الطعام في الإيه في الإفطار في هذا اليوم لأن أنا لو اديتهوله قبل كده ممكن يخلصه إيه قبلها،

لكن أنا كده تأكدت تماماً أنه سيكون سعيد في هذا اليوم هو ده الغاية اللي أنا عايزها. أنا أفرحه في يوم العيد يوم ما كلنا هنفطر الصبح مفيش حد بيوفر قبل الفجر هنفطر بعد الفجر كلنا مثلاً أو بعد صلاة العيد يبقى أنا متأكد إن هو دلوقتي معاه زينا عشان كده هو أفضل وقت.

لو استطعت يعني، لو حاسس إنها هتتكبل لا خليها خلاص في الأمان من أول إيه؟ المغرب بتاع ليلة العيد إيه معك وقتك فده ده **وقت الوجوب ببدا المغرب.**

**ويجوز أن تخرج قبل ذلك كمان قبل العيد بيوم أو يومين** ودليل ذلك أن ابن عمر رضي الله عنه وبعض الصحابة كانوا يفعلون ذلك.

فطبعًا قد يحتاج الإنسان إلى ذلك فمثلًا إيه إن الزكاة كتير والفقراء مش هينفع نديهم كلهم في يوم واحد وهم ببيجوا وأنا عاملهم أيام وأنتم تيجوا اليوم كذا ويوم كذا عشان منتكعبلش فاهم ازاي؟ فممكن أحتاج أطلعها بدري شوية عشان متزنقش، عشان زكاة كتير.

تخيل جمعية ولا مسجد ولا ولا بيجمع زكاة بمئات الآلاف بيكون عنده كميات ضخمة وعنده مثلًا ألف فقير ألف حالة ولا ألفين حالة هيجوا امتى دول فبيدي ده ميعاد النهارده أنت امبارح أنت اول كده يعني، لكن ما يبعدهش أقصى ما ورد عن الصحابة يومين قبل العيد.

وده طبعًا عشان يغلب على ظني إن هو هينتفع بها يوم العيد إن أنا لو ادتيهاله قبلها بكده أكيد هتخلص، يبقى أنا معملتش حاجة. مينفعش أديهاله قبلها بأسبوع.

إنما أقصى شيء لو أنا اديتها للفقير بدري أديهاله بدري يوم أو يومين أكثر من كده هتخش بقى إيه الناس هتقولك لا زكاتك كده أنت مدفتهاش في وقتها مش هينفع لازم تطلعها في الوقت والوقت يبدأ قبل العيد بيوم أو يومين وينتهي على صلاة العيد.

طب لو واحد أخرها بقى بعد صلاة العيد؟ خلاص راحت عليك زكاة الفطر وتأثم للتأخير ويجب عليك إنك تخرجها.

زي ما واحد راحت منه الصلاة صحي بعد الشروق مثلًا هيعمل إيه؟ هيصلي هيجيب ركعتين الفجر لكنه يأثم لأنه أخر الصلاة عن وقتها كذلك اللي عدت الصلاة هياثم لأن هو أخر إخراج الزكاة الفطر عن وقتها وغصبًا عنه برضو هيطلعها لكن هتسبله صدقة من الصدقات مش هياخذ أجر زكاة الفطر هياخذ أجر صدقة من الصدقات لكن أحسن إنه ميطلعهاش خالص.

النبي عليه الصلاة والسلام "من أداها قبل الصلاة فهي زكاة مقبولة ومن أداها بعد الصلاة فهي

صدقة من الصدقات"

طيب بالنسبة للناس اللي بتديها للمسجد بدري أنا مثلًا المسجد بيبتيدي أو الجمعية أو بيبندوا يجمعوا زكاة الفطر من النص رمضان فيقوله يا جماعة يلا زكاة الفطر فنبتيدي نديهم فلوس هل أنا كده طلعتها بدري؟ لا أنت مطلعتهاش بدري أنت عملت إيه دلوقتي؟ أنت وكلته يطلعها أنت مطلعتهاش أنت اديتها للفقير؟! لا أنت اديتها لواحد هيديها للفقير فانت كده مطلعتهاش بدري، أنت وكلته يطلعها في ميعادها هو بقى اللي مسئول الوقتي.

مينفعش الوكيل دوت سواء الشيخ اللي في المسجد ولا مسئول الجمعية ولا ولا هو ده لا يجوز إن يتصرف إن هو يعطيها للفقير قبل العيد بأكثر من يومين لكن أنت لما أدتيهاله أول رمضان نص رمضان أنت مطلعتهاش أنت وكلته يطلعها.

فدي مبتخشش معنا في مسألة الإخراج، لأنك أنت في الحقيقة لم تخرج زكاة الفطر إنما وكلت شخص إيه؟ يخرجها عنك فدي مفيهاش مشكلة. تمام؟ طيب.

## الباب السادس

### في اهل الزكاة

بيقول المسألة الأولى مَنْ هم أهل الزكاة؟ ودليل ذلك؟

بيقول أهل الزكاة هم المستحقون لها هم الأصناف الثمانية الذين حصرهم الله عز وجل في قوله " إِنَّمَا الصَّدَقَاتُ لِلْفُقَرَاءِ وَالْمَسْكِينِ وَالْعَامِلِينَ عَلَيْهَا وَالْمُؤَلَّفَةِ قُلُوبُهُمْ وَفِي الرِّقَابِ

وَالْغَارِمِينَ وَفِي سَبِيلِ اللَّهِ وَأَبْنِ السَّبِيلِ ۖ فَرِيضَةً مِّنَ اللَّهِ ۗ وَاللَّهُ عَلِيمٌ حَكِيمٌ "

دول الأصناف الثمانية الذين لهم إن يأخذوا من إيه لهم أن يأخذوا من زكاة المال. نقولهم باختصار بعد كده ممكن نبدأ المرة القادمة عشان هيبقى في كلام كتير في الجزئية دي.

#### ١- الفقير

هو مَنْ لا يجد، لا يجد ما يكفيه هذا يعني شبه معدوم ليس عنده شيء، فالفقير أقل حالاً من المسكين.

#### ٢- المسكين

في العادة هو شخص يجد لكن لا يجد ما يكفيه.

فقد يكون شخص يشتغل وقد يكون عنده اه وظيفة وقد يكون عنده محل بيأجره لكن في النهاية لا يجد ما يكفيه فده بيسمى مسكين، لكن الفقير في العادة بيكون شخص معدوش أصلاً يعني يكاد يكون معدوش مصدر دخل فبالكاد يعني بتمر عليه الأيام بصعوبة شديدة.

لكن المسكين ممكن يقعد نص الشهر مستريح كويس. بعد كده يجي النص التاني من الشهر يتداين ويتكعبل وممكن يعني يبقى هيجصله مشكلة مادية فعلاً فالفقير مستوى أقل من حال المسكين.

### ٣- العاملين عليها

هم دول اللي بتعينهم الدولة للعمل على على الزكاة، تعينهم الدولة فإذا كانوا متطوعين فليس لهم أن يأخذوا من زكاة المال.

وإنما العاملين عليها موظفين عينتهم الدولة وفرغتهم تماماً للعمل دوت فأتثناء الفترة اللي بيعملوا بها في جمع الزكاة وتوزيع الزكاة يأخذوا ما يكفيهم، يكفي حياتهم ويأخذوا من زكاة المال نفسها زي ما يكون مرتب كده ما يكفيهم لأن هو فرغ نفسه هياكل منين بقى في الوقت ده؟ ياخذ من زكاة المال ما يكفيه ويكفي أسرته ويكفي احتياجاته في الفترة دي كلها وياخذ ده من زكاة الإيه؟ من زكاة المال.

وطبعاً الدولة هي اللي بتحددله القيمة اللي بياخذها، مش هو اللي بياخذ من إيدته تمام أدي العاملين عليه.

### ٤- المؤلفة قلوبهم

هم قوم يحتاج الإمام أن يؤلف قلوبهم إما المؤلفة قلوبهم دول ممكن يكون كافر نريد أن يعني نحفره على الإسلام ودي تكاد تكون الحالة الوحيدة اللي ممكن كافر فيها يأخذ زكاة

الكافر ينفع ياخذ من الصدقة على فكرة ممكن تدي كافر صدقة لكن متنفعش تديله زكاة مال لأن زكاة المال هو نظام إسلامي خاص.

النبي عليه الصلاة والسلام قال لمعاذ قال أخبرهم "أن الله افترض عليهم صدقة تؤخذ من

أغنيائهم فترد في فقرائهم" يعني إيه أغنياء المسلمين إلى فقراء الإيه المسلمين.

فالزكاة هي نظام إسلامي خاص يعني حكر على المسلمين هو تكافل إسلامي بحت وأما الصدقة فنظام عام ينفع للمسلم وغير المسلم إلا في حالة المؤلفة دي المؤلفة قلوبهم هو الصنف الوحيد يكاد اللي ممكن كافر ياخذ فيه زكاة مال وهو أحد أصناف المؤلفة لأن المؤلفة قلوبهم اللي احنا بنتألف قلوبهم على مستويات ممكن يكون واحد كافر نرجو إسلامه يعني هو فاضله بس زكاة كده ويسلم فبنشجعه يعني فنديله فلوس بتاع فيحس إن تمام يخش الإسلام وبعد كده بيقتنع وخلص.

أو يكون حديث عهد بالإسلام لكن متذبذب يعني احنا عارفين إن هو أسلم جديد بس رجل قدام ورجل وراء كده قلقانين عليه فنثبته بالإيه نعطيه من زكاة المال فيفرح فيثبت.

أو بنعطي شخص زكاة مال حتى نكفي شر شخص شر وممكن يؤذينا مثلاً واحد على زي الأعراب اللي على حدود مدينة مثلاً ممكن يكونوا سبب في دخول الناس المدينة ممكن يخونونا ممكن ممكن هنعطيهم زكاة المال علشان إيه نأخذ الولاء يعني يبقى لهم ولاء لنا واخد بالك؟ أو أو ممكن يكون في أنواع من العلل المهم أن فكرة تأليف القلوب.

لو الموضوع مش محتاج تأليف قلوب خلاص زي سيدنا عمر رضي الله عنه كان في ناس بياخدوا حاجات زي كده عشان يكفي شرهم مش عارف إيه فلما مسك سيدنا عمر منع عنهم الإيه؟ منع عنهم زكاة المال وقال احنا خلاص دلوقتي احنا مش خايفين حتى لو عملت أي حاجة متقدرش تعمل معنا حاجة فمنع عنه لأن العلة مبقتش موجودة

أنا دلوقتي خايف من شرك طب أنا لو مش خايف من شرك خلاص هديك أدبك ليه؟ أنت لو حتى أصبنتي في شر أنا هعرف أرد عليك الصاع صاعين لكن في البداية طبعاً في أول عهد النبوة وبداية عهد الصديق كان لسه الموضوع ممكن يؤثر لكن مع زمان عمر وقوة المسلمين وقف السهم بتاع مؤلفة قلوبهم لانه لم يعد هناك حاجة للسهم ده لقوة الدولة الإسلامية.

## ٥- في الرقاب

يدخل فيها فك يعني تحرير العبيد تدفع تمن عبد وتحرره هيدخل فيها فك الأساري لو كان في أسرى عند الكفار وتدفع من زكاة المال عشان نحررهم الرقاب.

## ٦- الغارمين

هو الشخص اللي اداين اداين لحق نفسه أو لحق غيره يعني إيه لحق نفسه أو لحق غيره؟ يعني واحد اداين لسبب فيه هو هو محتاج فلوس فالداين وبعد كده اتكبل ومش عارف يسد الدين ممكن نديله من زكاة المال نساعدده

أو استدان لحق الغير يعني إيه استدان لحق الغير؟ يعني راجل دبس نفسه في دين عشان يحل مشكلة.

حصل مشكلة بين ناس ودول عايزين من دول فلوس وبعد كده الموضوع قلب بخناق والموضوع هيقب بدم ودول هيجيبوا ناس وهيحصل مشكلة كبيرة فقالهم خلاص يا إخوانا الفلوس دي عليا فيضطر يعمل كده عشان يحل مشكلة فدوت يعطى من زكاة

المال علشان يحل المشكلة دي لو هو ميقدرش خصوصًا لو هو ميقدرش يدفع فده يعطي من زكاة المال، حتى لو استدان لحق الغير قالهم خلاص الدين ده علي عشان يحل إيه؟ يحل مشكلة بين ناس يعطى من زكاة المال الغارمين..

### ٧- وفي سبيل الله

المراد بها الجهاد وكل ما يعين على الجهاد سواء السلاح والعتاد أو الأموال التي تنفق على المتطوعين في الجهاد وأما من تعطيهم الدولة أجر زي المقاتلين مثلاً لو افترضنا الجيوش دلوقتي المقاتلين بياخدوا أجر ده خلاص ملهمش إيه ملهمش زكاة المال لكن لو كانوا مقاتلين متطوعين والعملية كان موضوع الجهاد في سبيل الله فالإمام بيديهم منين؟ بيديهم من زكاة المال وده معنى قوله تعالى وفي سبيل الله.

احنا خدنا فكرة اجمالية كده عن الأصناف اللي بتاخذ من زكاة المال

المرة القادمة بإذن الله تعالى ناخذ بالتفصيل وبعد كده هناخده نكمل الباب ونخلصه بإذن الله تعالى جزاكم الله خيراً

سبحانك اللهم ربنا وبحمدك أشهد أن لا إله إلا أنت أستغفرك وأتوب إليك.